



**Uunga siunnersuut: Inunngortunik, toqusunik, ilisinernik iliveqarfinnullu nalunaaruteqartarneq pillugu Inatsisartut inatsissaat nr. xx, xx 2016-imeersoq.**  
(Ilinniartitaanermut, Kultureqarnermut, Ilisimatusarnermut Ilageeqarnermullu Naalakkersuisoq)  
(Siullermeenera)

Demokraatini nuannaarutigaarput una inatsit, nutarterinerusoq aamma periutsinik iluarsaassinerummat. Iluqaataajuaannarpoq akuttunngitsumi inatsisit qimerloortarnerit nutartertarnerilu.

Iluarisimaarlugu paasivarput inatsit siunissamut qularnaarneqartoq imatut paasillugu aamma atorneqarsinnaasoq toqusunik ikuallaasoqartillugu tamanna Kalaallit Nunaanni siunissami periarfissaalerpat.

Paarlattuanik isumaqarpugut tusarniaaneq tamakkiisuusimanngitsoq. Ilagiinni kikkut tamarnik tusarniarneqarsimapput atortussanili takussaannngilaq ilagiit kristumiut allat tusarniarneqarsimanersut aamma ilagiit kristumiuunngitsut tusarniarneqarsimanersut.

Taamaattumik Demokraatini inatsisissatut siunnersuut Inatsisinik atortitsinermut Ataatsimiititaliamut ingerlateqqinniarparput kaammattuutigalugulu aappassaaneerpeqannginnerani ilagiinnut, kalaallit ilagiivinut ilaanngitsunut tusarniutigalugu nassiunneqassasoq.

Aamma soorlu assersuutigalugu Danmarkimi ilagiinnut mosaiskimut aamma islamisiortunut taakku Kalaallit Nunaanni juutinut musliminullu sinniisuusut naatsorsuutigisariaqarmat.

Taamatut oqaaseqarluta siunnersuut Inatsisinut atortitsineq pillugu Ataatsimiititaliamut innersuupparput.